

Juffrouw Evy Raven

“Mi ta gusta inspira mi muchanan pa wak nan progresa”

ORANJESTAD- Minister Michelle Hooyboer-Winklaar a decreta october como Luna di Enseñansa y a dicidi pa organisa un serie di evento y curso relaciona na enseñansa na honor di docentenan di tur nivel di enseñansa na Aruba. Tur docente a ricibi un “danki” special den forma di un appel cu un carchi.

E titular di enseñansa scoge tambe pa expande riba un tradicion nobo cu tin apenas algun año, esta e premio Maestro di Año. E año aki a presenta e “Appel di Oro” y a agrega diferente categoria mas na e nominacionnan. Juffrouw Evy Raven, kende ta docente na Scol Paso pa Futuro, a ricibi e Appel di Oro

como Maestra di Año den e categoria Enseñansa Special. E docente no a spera pa nada cu e lo gana e premio pasobra e ta considera e otro nominadonan docentenan sublime y ademas, tabata “root” pa nan. E Appel di Oro pa Juffrouw Evy tabata un dushi sorpresa, e ta expresa. E mes no por kere cu manera el a cuminsa su curso, pa puro casualidad, e lo a yega na gana un premio nacional.

Evy Raven ta splica cu tempo cu e tabata den examen klas di HAVO el a pensa cu e no lo slaag, pero ora cu su resultadonan sinembargo no tabata mes malo cu e mes a pensa y el a logra slaag, no a keda nada otro cu bay scol na Aruba y e tempo ey e unico opcion cu a keda pe tabata “APA”. E ta conta cu el a cuminsa e

curso pa maestro sin mucho gana y a bisa su mama cu si e no gusta e no ta sigui. APA tabata un cambio di curason pa Evy, kende ta comenta cu el a haya docentenan increibel cu a inspira su persona, su prome juffrouw di stage na Colegio Santa Teresita tabata un persona increibel y di ey nan su vocacion a nace.

Juffrouw Evy ta agrega cu ta maestro pues no ta algo cu el a scoge, pero el a cay aden. E ta subraya cu e ta stima su trabao, e ta encanta traha cu mucha y ta gusta inspira nan. E tin hopi placer den wak cuanto nan a progresa na final di e año escolar y ta hopi orguyoso di tur su muchanan. “Pa mi esey ta e regalo di mas grandi,” Evy Raven ta expresa.

Su trabao no ta facil, pero e



ta recompensa hopi pa wak cuanto cos e muchanan por na final di e año.

Juffrouw Evy ta subraya cu su muchanan no ta special, tur mucha ta special y unico

cos cu su muchanan mester ta simplemente un tiki extra ayudo, un tiki extra guia, kisas un tiki extra ripiticion, pero nan por siña y nan por siña hopi bon tambe. □